



**Vschinauncha da S-chanf**  
7525 S-chanf



---

## Da la suprastanza cumünela settember 2019

---

### Tscherna contabla /-el

La suprastanza cumünela elegia a duonna Monica Schöpf-Gabriel scu nouva contabla da la vschinauncha da S-chanf. Ella po cumazer già principi october cull'introducziun (singuls dis) tal cumün da S-chanf. Davent dals 1. schner 2020 surpiglia ella la piazza da la contabilted.

### Tscherna post da revisiun

Causa il nouv model da quint HRM2, ho il vegl revisur da quint, demischiuno sia carica per la fin dal rendaquint 2018.

La chanzlia ho piglio aint quatter offertas da büros da fiduziaris.

La suprastanza cumünela tscherna a partir da dalum il büro da Lischana Fiduziari, Scuol scu nouv post da revisiun da la vschinauncha da S-chanf.

### Dumandas da fabrica

La suprastanza cumünela aderischa seguaintas dumandas da fabrica:

- Somvih 33, magazin nouv suotterraun
- Davous Chesas 6, fnestra nouva giaschanteda sün tet

### Cunvegna da prestaziun ESTM in connex cul büro da turissem S-chanf

La cumischiun cumünela da turissem ho fat üna dumanda da prolungiazium d'ün an da la cunvegna da prestaziun traunter ESTM SA e la vschinauncha da S-chanf in connex cul büro da turissem a S-chanf. La ESTM ho elavuro sün dumanda da la regiun Maloja ün concept d'infurmaziun chi prevezza da prolunger las cunvegna da prestaziun cullas vschinaunchas in connex culs büros da turissem, per duos ans. Scu proget da pilot sun previsas per prouva las seguaintas prestaziuns:

- l'introducziun dal modul "kiosk digital"
- l'introducziun dal modul "fnestrigl virtuel"
- l'introducziun dal modul "cussagliaziun persunela da giasts mobila"

Moderaziun ed elavuraziun d'ün concept "posts d'infurmaziun e manaschi da turissem Plaiv cul böt d'introducziun per l'inviern 2020/2021".

Ils cuosts da prestaziun pel post d'infurmaziun importan 19'710.00 fr. (access a l'informatica, scolaziuns, vestimanta, licenzas). Pel fnestrigl virtuel as stu büdschetter 10'000.00 fr..

La suprastanza cumünela es daperüna cull'incumbenza da prestaziun da la ESTM SA.

### Surdeda da lavuors lingia d'ova Quedras

Tar la collaudaziun da la lingia d'ova e dal reservuar Quedras s'ho musso, cha tuots duos condots tal reservuar cuntegnan ajer e cha'l transport dal maximum da la quantited d'ova vain perque redot fich ferm. Il büro d'indschegniers Toscano propuona duos pussibiliteds per schoglier la problematica. La varianta pü bunmarcheda füss da fer üna vasca d'egualisaziun a Quedras. Ils cuosts sun da piglier sù i'l proget "lingia d'ova". Quista realisaziun da las lavuors sun necessarias per cha'l provedimaint d'ova da baiver Quedras funcziuna sainza maungels. Ils cuosts da realisaziun per quistas lavuors s'amuntan sün 29'332.05 fr.- incl. IPV.

La suprastanza cumünela decida da surder la lavur cul oblig cha mincha lingia da funtauna sbütta singul. Il depüto stu passer pled in chosa cul büro d'indschegner Toscano e survgnir la garanzia per que aunz cu cha l'incumbenza vain surdeda definitivmaing.

### **Surdeda da lavuors renatüraziun Pass Chaschauna**

In connex cullas lavuors actuelas e la realisaziun da las sendas e vias per velos da muntagna sül Pass Chaschauna, es gnieu constato, cha's po druver cun sen la terra naira ramesseda. Quista terra naira as po luvèr aint in "Big Bags" ela transporter cul elicotter tar la via veglia per renatüraliser quella. L'impressari ho fat üna cumpilaziun dals cuosts correspondenta per realiser quista lavur.

Siand cha quistas lavuors nu sun cumpigliedas i'l preventiv, decida la suprastanza da lascher fer las lavuors tenor offerta a la firma Trailworks GmbH, per total fr. 6'462.00, incl. IPV.

### **Surdeda da lavuors da cuvrida Somvih e Davous Chesas**

La via da quartier Somvih-Davos Chesas as rechatta per part in ün fich nosch stedi. Per pudair realiser las lavuors da la part da la via, ho il supstant dal departamaint pertucho lascho fer ün'offerta tar la firma da cuvrida in questiuin. Las lavuors cuntignan adattamaints da l'otezza da las vascas ed üna nouva cuvrida cul chanel d'ova aint illa salascheda. Impü es que eir per la rumida da naiv e prevenziun da glatsch aint in quel traiget da grand avantag. Ils cuosts vaun a chargia dal conto "mantegnimaint da vias".

La suprastanza cumünela approvescha las lavuors da via da la firma Implenja per total 19'332.80 fr. incl. IPV.

### **Analisa da sgüraunzas da persunel da l'administraziun cumünela**

La chanzlia ho incumbenzo trais sgüraunzas da lascher gnir novas offertas pertuchand las sgüraunzas da persunel per pudair preschanter ün conguel a la suprastanza cumünela. As tratta da la sgüraunza d'accidaints obligatorica (BU e NBU), da la sgüraunza d'accidaints pel possessur d'intrapraisa e supplementer pel persunel (UVGZ) e da la sgüraunza diaria per persunas amaledas.

In tuot paun gnir spargnos culs novs contrats da sgüraunzas bundant fr. 8'000.00 per an.

La suprastanza cumünela decida da fer giò las sgüraunzas in regard la sgüraunza obligatorica d'accidaints nouv tar la AXA e la sgüraunza pel possessur d'intrapraisa e supplementer pel persunel UVGZ nouv eir tar la AXA. Cun que cha la ÖKK ho la sgüraunza diaria per persunas amaledas la pü favuraivla, resta quella tar la ÖKK.

### **Parkegis Bügl Suot dumanda da abolir ils parkegis**

La situaziun cul parkegi Bügl Suot nu cuntainta. A vain adüna darcho parco in crusch ed in traviers, ils 3 parkegis chi sun previs nu vegnan respettos. Perque do que adüna darcho discussiuns e emoziuns tar ils possessuors da las parcellas involvedas. Cul scriver dals 30.08.2019 dumandan püssas persunas da Bügl Suot da schoglier ils trais parkegis. Tenor la polizia chantunela a's stuves piglier in vista la procedura da publicher l'intera chosa aunch'üna vouta per 30 dis illa chascha naira e zieva 30 dis i'l fögl ufficiel. Zieva dess que ün nouv decret e cun que füss eir garantieu l'udida giuridica.

La suprastanza cumünela ho piglio cugnuschentscha da la proposta da stricher ils trais parkegis sainza cumpensaziun e decida d'inizier la procedura bsögnaivla.